

## Giuvn, romontsch e plein slontsch

Giuvna Beeli ha presentau al scalem superiur a Laax las activitads dalla giuventetgna minoritara

(anr/ac) La presidenta dalla Giuventetgna dallas cuminonzas etnicas europeicas ei s'exprimida il margis vargau avon la tiarza classa dil scalem superiur dalla scola da Laax. Giuvna Beeli ha intimau la giuventetgna romontscha da s'engaschar per igl agen status minoritar e da veser la Romontschia sco part dad ina gronda famiglia da minoritads europeicas. Il diember da cedels mellens taccai vid la tabla sut il cavazzin «avantatgs» ei in bionton pli gronds che quel sut il diember sut il cavazzin «disavantatgs». Per plascher da *Giuvna Beeli*, dapi biebein miez onn presidenta dalla Giuventetgna dallas cuminonzas etnicas europeicas. Ella ei turnada la mesjamna vargada ella stanza da scola a Laax nua che la dunna giuvna oriunda da Sagogn ha sezza frequentau la scolaziun superiura avon 10 onns. Per sepresentar viers ils 25 scolars e scolaras dalla tiarza classa dil scalem superiur dallas vischnauncas da Laax, Falera, Sagogn e Schluein. Enteifer il rom da romontsch instruius da *Vanessa Derungs* e *Rico Deflorin* ha Beeli presentau las activitads dall'organisaziun da Giuventetgna Rumantscha, la GiuRu, e l'organisaziun ch'unescha la giuventetgna da diversas minoritads europeicas. Gl'empremdenton ha Beeli discutau cun scolaras e scolars la definiziun dalla minoritad. Sco minoritad linguistica ein Romontschas e Romontschs buca persuls ell'Europa. Beeli ha numnau entginas dallas 337 minoritads linguisticas europeicas cun circa 100 milliuns persunas che plaidan 90 differents lungatgs. Da quels 90 lungatgs ein sulet 37 reconuschi sin ina moda ni l'otra dil stadi e 53 buc. En quei senn appartegn il lungatg romontsch als privilegiai cun siu status uffical e l'instrucziun en scola.

## Culturas periclitadas

Tenor las explicaziuns dalla presidenta dalla Giuventetgna dallas cuminonzas etnicas europeicas vala in lungatg per periclitauas sche meins che 300 000 persunas tschontschan quei lungatg. Cun ses 40 000 entochen 60 000 plidaders appartegn il lungatg romontsch alla part periclitada. Tonpli vala ei da s'engaschar per quei lungatg e per Beeli ei il support dalla giuventetgna impurtonts. Ella ha presentau a scolaras e scolars dil scalem superiur las activitads dalla Giuventetgna Rumantscha cun ses biebein 370 commembers oriunds da tuttas regiuns romontschas. Activitads en tiara romontscha ed els impurtonts marcaus svizzers nua che la GiuRu organisescha scuntradas romontschas ch'anflien dabia accoglientescha. Entretschada ei la Giuventetgna Rumantscha denton era en las organisaziuns da giuventetgna da diversas minoritads linguisticas europeicas. En tun e maletg ha Beeli presentau entginas dallas scuntradas europeicas e fatg attent als turniers da ballapei sco la Europeada. Ella ha intimau scolaras e scolars da s'annunziar per ina ni l'otra scuntrada en diversas tiaras e marcaus europeics e per gronda part finanziada dallas organisaziuns. Las sentupadas porschien interessants contacts cun glied giuvna confruntada cun auters problems, denton cun semegliontas visiuns. La capientscha restrenscheda dad in lungatg minoritar ei stada nudada da scolaras e scolars dil scalem superiur ton sut il cavazzin dils avantatgs sco dils disavantatgs. Tschintschar in lungatg che buca tut capescha ei cool e segn dad ina

individualitad significanta. Ella po magari era restrenscher il radius d'acziun. Igl access romontsch alla plurilinguitad po ulivar quei disavantatg.

## **Ina incumbensa ordvart interessanta**

Beeli ha relatau da sia incarica al tgamun dalla Giuventetgna dallas cuminonzas etnicas europeicas che porschi dabia satisfacziun. Biars contacts enten la suprastanza selain instradar via la reit sociala. Tuttina ei la presidenta dabia sin viadi. Actualmein sto vegnir tratg fil en guila per finanziar las activitads dall'organisaziun europeica. Finanzas che vegnan per part dil Cussegl d'Europa domiciliaus a Strassburg. Coordinar las activitads al tgamun dall'organisaziun cun igl agen temps da lavur ei pli probabel la pli gronda sfida. La presidenta less integrar ell'uniun dalla giuventetgna minoritara europeica dapli representanza dallas minoritads franzosas e spagnolas entochen ussa strusch dalla partida. E sper quellas activitads pren Beeli peda da visitar ina ni l'autra scola romontscha.